

四庫全書

集部

欽定四庫全書

敬業堂詩集卷二十一

翰林院編修查慎行撰

皖上集

起丙子正月盡四月

去冬歸自汴梁今年擬息勞筋稍理舊業適承座  
主清溪公之命與令孫任可偕往皖城避春江風  
浪之險由四安鎮取山路經宣城池陽抵黃盆口  
始渡江皆向來遊蹟所未到也

題三娘子圖四首 并叙

按諸葛元聲兩朝平攘錄三娘子俺答長女也生而  
清麗資性穎異善書番文尊中國尚瞿曇每於佛前  
懺悔求再生當居中華已受襖兒都司聘俺答通焉  
遂奪之隆慶五年俺答歸順封順義王三娘子封忠  
順夫人萬曆壬子俺答死其舅黃台吉然而配之黃  
台吉納婦一百八人以象數珠三娘子佐之貢市惟  
謹台吉死長子扯力良襲封復然而配之丁亥六月

扯力良同妻入邊巡撫鄭洛傳語三娘子無忘香火

舊情卒聽平受賞於弘賜堡

去大同  
六十里

十七年間三封

貴爵貢市之不渝多有力焉獨石中軍素善繪因密  
圖三娘子及受封三王像以獻於朝故得其詳如此  
馬子衍齋屬周兼畫此圖索余題句略撮始末使覽  
者有考焉

香燈小炷懺前因一念三生誤隔塵莫聽琵琶思入塞  
明妃曾是漢宮人

別移部帳事休屠衆裏方知顧盼殊百八摩尼齊合掌  
讓他一顆佛頭珠

詔恩三換等兒嬉報貢頻頒五色絲見說兩朝曾款塞  
不知通好是關氏

埋香青冢亦堪悲粉黛流傳又一時想像承平光景好  
風流邊將畫蛾眉

雨後行園梅花已落力輩方編籬

宿雨潤苔痕幽人杖藜至池邊一株雪狼藉香滿地不

忍踏成泥猶存惜花意平生無長物外遇中鮮滯一出  
動經年窺園偶然事敢爲花作主吾老身如寄乃復補  
樊籬遮防亦情累小童如我嬾長養薔薇刺欲剪又躊  
躕何當絕非類

食薑心菜

用心霜雪餘尺寸取易長土膏發春雨其葉沃以光漸  
見碧玉蓼枝枝葉中央初來但小摘爛漫抽四旁花時  
籬落間色比黃金黃而我乃爲口斲歸滿筠筐芼之供

盤餐指動齒頰香貧家寡私奉婢僕皆品嘗可無勤惰  
分於此示激揚園丁給宜厚特以七箸償山田歲不登  
老圃聊救荒所慚勞汝力充我藜藿腸

南湖舟次遇魏禹平時禹平歸自濟南余將往  
皖上二首

低田幾稜菜花雨野水一灣蘋葉風却向家鄉話京國  
小桃猶是別時紅

烟雨迷濛港脈斜葑湖水落吐圓沙春波門外春帆影

君是還家我別家

順風無帆戲作短歌

風頭滾滾浪花白  
啣尾鄰船開絡繹  
千檣多作挂帆行  
弦曠虛弓箭初釋  
開翎一一鴈投渚  
騁足羣羣駒過隙  
同時離岸我獨遲  
我坐無帆聊挂席  
偶然利鈍各有數  
相去寧須論什伯  
來船未必盡無帆  
笑爾有帆風又逆

董文敏臨米天馬賦卷子真蹟  
余弟德尹以十  
二金購自賣骨董某家  
鑒微上人貽書張岍老



謂爲遠客攫去足值五十金岍老作長歌紀其  
語至呼弟爲惡客且云此公詩歌妙絕特削其  
名氏正欲寄元激之使戰語托滑稽其實乃深  
忌之也時德尹已北去戲次原韻卽倣岍老體  
并示鑒公

古來善書者稱聖亦稱顛張芝米芾相繼出遂覺格勢  
大變非從前華亭老宗伯落筆何翩翩衆中自集一家  
法學本人力姿由天偶然放手撫寫天馬賦一斑窺豹

知其全人間流落有此本幾逐市販同推遷昨來忽入  
好事眼三百十字顆顆明珠圓傾囊倒篋可笑不自量  
巧取或怵他人先腰纏十金一揮隨手盡世上乃有此  
種揚州仙還家但徒步不辦書畫船老僧旁觀歎且妬  
謂此可值五十千大爲得者長聲價贖卷十倍增鮮妍  
語聞張子忼然失固是痴癖寧非賢君家向來收藏亦  
已夥細入針孔思貫穿得無羨魚人往往猶臨淵去年  
卧病九十日料理藥物供高眠頗聞典賣及古玩何異

開閣散遣諸婢娟故人傳與衛生訣撥棄嗜好年方延  
性之所近終不化如噉石蜜甘中邊又如雅量暫止酒  
麩車相遇口角仍流涎作詩相惱觀一擲寸鐵不用張  
空券豈如懷寶出間道捲旗卧鼓有似刀藏鉛無端索  
和乃到我野戰突上荒山顛謂我曾經閱此卷劇壘相  
向師非偏我能爲汝咸其輔頰舌使汝銖腎刻肺飲食  
夢寐中難捐書評髣髴舉大概虎跳鳳翥龍蜿蜒若將  
墨寶比良劍也應光怪直射文星躔然而達人宜自廣

美玉豈必收于闈貪多務得物斯聚富而可求吾亦爲  
執鞭近來書畫大半入秘府居竒幾輩包裹充膏緣三  
間茆屋配汝作清供書生習氣如此真可憐猶復曉曉  
引喙較得失物情什伯千萬胡相懸我於妙墨豈不好  
只坐欲買羞澀囊無錢金奩玉軸所見不爲儉過眼瞥  
爾心恬然必教一一皆己有天地何以生雲烟况聞佛  
法無我相試拈此句詰老禪滑稽代作解嘲語滿紙倔  
強定有瀾翻篇翰攻倘許破堅壁正恐筆削爲無權嚴

詩他日編杜集能禁此客姓氏泯泯終無傳

去秋自河南歸攜植牡丹數種春來適有安慶  
之役不及待其開以詩紀別

客遊出梁宋地主頗不俗貽我六娉婷相隨到空谷我  
貧寄茆茨貯爾無金屋繁華有借境直以名姬蓄殷勤  
手親栽不忍委僮僕冬暖少雪霜春陰滋霹靂栽培本  
天意私願苦難足可惜姚家黃一株萎偏獨五家尚成  
隊紈綺可合族別之豈無情行期爲改卜未償道路債

妄冀看花福開時米出門詩識已早伏

余去年詩有未必花時穩閉門

之明年豈不好吾老狀可掬應笑歸來遲尋春同杜牧

塘西舟中喜晴得六言律詩一首

雨絲渺渺將斷日氣葱葱半銜客路漸逢寒食遊人未  
換春衫桃花古渡茆店柳色輕烟布帆此去清溪不遠  
數尖已露晴巖

過峽老與之論詩

昨日鳩喚雨今朝鵲報晴村村桃李花處處隨浮萍中

流幾千點著此孤舟輕故人知我來一笑門前迎別來  
四十日頗覺太瘦生苦吟誠乃疲中有金石聲子詩人  
所怪任意方孤行自喜正在茲焉能博時名引我附同  
調背汗顏亦頰失學事情惰游東西無期程古人傳著述  
多在名山成涉獵得其粗不如閉戶精子今雖善病幽  
居領餘清物理與天機靜觀皆性情願子堅自信後來  
有公評

飲周柯雲家玉蘭花下

小船撐入菰蔣牙主人如客偶在家入門一揖仰面笑  
玉樹正吐牆頭花此花畏雨兼畏日難得春來好天色  
今朝恰是養花天又被狂風恣狼藉興來相就席乍移  
無酒酤我我不辭杯中自吸冰雪影紙上誰賞瓊瑤詞  
白雲茫茫屋上下醉眼迷離兩相射鉤簾何用更燒燈  
自有花光能照夜

寒食湖上作二首

紅粧催上木蘭舟女伴家家愛出遊多事六橋新柳色



自含烟雨自遮樓

葑田青合去年沙  
遠岸殘桃賣酒家  
錯怪東風欺老眼  
我來原不爲尋花

題蔡藜輝舫齋次峴老韻

風過溪來洒面涼  
一支健水出餘杭  
平分半幅疑看畫  
難得三間恰向陽  
漁網愛牽簾影動  
釣絲閒拂水花香  
浮家倘許來相就  
剪取橋南足練光

從湖州至四安舟中大雨

山迴兩崖高路盡一川狹春流不盈尺野艇容恰恰正  
賴急雨來須臾同放棹孤蓬支兩膝兀坐如被壓問路  
屢見紿方言亂鵝鴨紆遲終到岸我有安心法首路又  
登山回頭憶清雪

雨中過九里岡

平生狎濤江老怯風波惡茲遊特改路意取山行樂一  
笑我命窮天公大戲劇朝來發古鎮苦雨若赴約肩與  
煩兩夫蹉跌防失脚山山勃姑叫泥滑石齷齪漸上九

里岡險如出劍閣我本村野姿浪遊因落魄無端役人  
力揣分非所托稍待天放晴前林候乾鵲勞生就徒步  
庶免中心忤

廣德州

山勢豁一州中央據衍土地當江浙會開拓自洪武長  
興環其東外捍等干櫓西南界宣歙兀突重巖俯長江  
乃北門集慶倚堂廡當并耿鄧功拱翼事真主張吳勢  
雖偏力絀不得取時危有關爭事往失險阻如今城下

路日夜走商賈獨有好事人登城尚懷古

連日風雨山行頗有寒色

盤旋八九里下上千百尋身在雲氣中不知山淺深  
雨聲挂奔瀑風響交長林空谷早晚寒颼然作秋陰初疑  
春不到忽有啾啾禽

飲十字坡茶菴

連岡踏成泥山骨似無石汗池之所瀦土赤水亦赤瓢  
漿乃時需解渴聊飲血一飲不自持吁嗟遠行客

紅林橋

山花不知名山鳥多聚族深村窅然入樹影散晴旭人  
家石橋邊共吸一溪涼年豐旅食賤市遠無魚肉但覺  
松毛香茅簷燒筍熟

宣城道中喜晴

宣城古郡風土嘉就中最樂惟村家我來正值積雨後  
雲氣解駁生晴霞岡巒過盡徑路坦溝洫流去田塍斜  
新茶未焙穀雨葉早稻已茁清明芽長鬚搖風翻宿麥

新翠著地鋪胡麻柴門相接綠陰裏籬落綴以朱藤花  
迴思連日走旋潭若涉大海無津涯人間乃復有此景  
始覺大地猶春華

曉望敬亭山懷梅耦長孝廉

千峯含霧爭出沒惟有敬亭先得日相看不厭吾亦云  
可惜遊踪難自必都官詩派誰復論家法傳與長身孫  
孝廉詩好畫亦好不愛城市居山村昔在京華曾倒篋  
看畫求書情頗狎入山不訪住山人古者論交無此法

山川興到尚可乘他日重來能不能作詩爲報句溪叟  
聊記吾曾過宛陵

高嶺菴小憩

再上已無路中休宜有菴花陰移客座松氣接僧談俯  
視風斯下端居戶正南一泉香積味慚愧荷分甘

渡清弋江

一曲清江抱白沙收之佳句舊曾誇乍離古渡船如葉  
初換春衫客憶家遠處人烟連竹色晴來村店忽楊花

亂山青過陵陽路遙指雲頭辨九華

飲劉蘧菴光祿慕園二首

恬澹知君性中年早罷官自耽泉石趣轉覺世途難爲  
我開花徑攜樽就藥欄肯辜楊柳月深坐到更闌

此來吾有幸別圃得春光地主留花待詩情被酒狂欸  
門煩兩使愛客到諸郎千里能相就何須置鄭莊

南陵早發

林深葉密曉冥冥旭日初啣霧未醒小店門開惟土竈



一菴僧閉但茅亭秧從布穀聲中綠山向畫眉啼處青  
獨與野樵爭路入偶逢釣叟覺魚鯉

山家柴柵編竹而不築牆云以拒虎虎能踰牆  
而不敢窺籬蓋疑其爲陷穽也作虎落歌

危巖下瞰千仞壑猛虎騰身只一躍東村黃犢西村羊  
入室踰垣恣饕虐山人不以牆禦虎挿竹成籬用藤縛  
目睛如炬不敢窺疑是中間伏機獲天生人智爾則愚  
咆哮作力何爲乎不知此法自誰創陰絕覬覦真良圖

周防莫遣樊籬破與虎爲鄰可高卧

蕎麥灣大雨

蹇驢蹙蹙牛蹄重雨脚斜飛密無縫雲蒸霧氣取境迷  
泉挾雷聲撼山動詩人好遊復好奇衣沾履濕去不辭  
人生行路難如此偏在溪山最好時

山店阻雨次徐任可韻

長程愁冒雨小市喜臨橋旅飯畱人住征衣借火燎溪  
喧窗逾靜吟苦膝頻搖莫作衝泥去尋山不在遙

行經九華山麓欲登不果任可有詩戲次其韻  
玉池瓣瓣蓮石角株株筍去天纔一握豈可尋丈準一  
百六青峯峯峯入吾矚終焉就埋沒雲霧諒不忍天如  
憐詩人久被陰雨窘雖非鸞鶴姿稍異蟄蟲蠢撥雲使  
就道迴馭控鞅鞞我僕忽告勞從旁乃微哂平生汗漫  
遊衰暮興易盡向來徒碌碌臨去猶惓惓寄語雲中人  
塵寰終遠引他年香案吏名籍倘未泯

碎石嶺詞

黃泥岡頭白日黑竹雞一聲石盡劫杜鵑勸客不如歸  
鷓鴣阻人行不得居人慣聽不覺愁一蓑背雨唱歌去  
我與爾同風馬牛

初至皖城喜遇同年姚別峯兼招程松臯舍人  
宣城渡頭三月尾荻洲新漲河豚起片帆帶雨剪江來  
意外班荆得姚子人情得隴每望蜀便想同時兼兩美  
作詩更欲招之罟東向樅陽寄雙鯉大龍山頂龍眠麓  
起伏尻脰百餘里晴光欲動草翻烟春事將闌花潑水

君能命駕姚亦留猶及同看紅藥蓋

程松臯得余所寄詩即夕自桐城命駕過皖次

東坡喜劉景文至韻

偶然折柬相招呼起聽雙鵲鳴庭隅知君與我不遐棄  
古義鄭重令人無肩輿西來二百里疾足遠致兩僕夫  
欵門大笑發狂喜屐齒忽折行須扶余頭漸添種種髮  
君領競長鬢鬢鬚別來三歲遽如許尚不作達寧非迂  
勿嫌江城春已晚百物生意咸昭蘇梢頭紅藥若有待

含語未吐真名姝  
烟花滿前太狼籍  
風雨賴汝能支吾  
有情相對且盡醉  
只恐酒醒仍江湖

懷寧劉東臯明府招飲薔薇花下

江城十日九日風  
遊絲落絮飄晴空  
春光却在令君宅  
別館布席依芳叢  
竹籬半庭添曲折  
葉幌一架穿玲瓏  
不知花頭幾萬朵  
但覺香靄浮簾櫳  
晚霞烘天鶴頂赤  
杯面倒影魚鱗紅  
小胥抄詩浣清露  
狂客噓氣攄烟虹  
人言簿書妨作達  
正坐才短心憧憧  
如君治劇本閒暇

豈有塵霧能相蒙  
神清政簡若無事  
佳興自與遊人同  
不辭小戶徑  
霑醉髮鬢置我葡萄宮  
酒闌更話十年舊

獨惜座上無車公

朱悔人與劉君  
同邑交好故云

三月二十九日賦餅花

客中春忽盡  
僧舍少嘉樹  
野草着幽花  
荒庭邀一顧  
膽餅貯遠汲  
紅紫挿交互  
雖深攀折憐  
且免風雨妬  
新枝若矜寵  
昨者便成故  
也復有遊蜂  
窺尋入窗戶  
沾泥落衽席  
等是閱朝暮  
微物感吾心  
流光去如鷲

晚晴登安慶城樓

浩浩風聲晶晶沙大江東去日西斜  
雄關地脈來千里古郡山頭有萬家  
一鳥帶烟投皖口亂帆如葉點楊槎  
最憐落拓重遊客獨倚高樓看落霞

同年左子畏家上臣各有魚米之餉詩以報謝  
裹飯初來似趁虛可能彈缺賦歸與故人館俸慚供米  
久客江城愛食魚垂餌欲分鉤上粒勸餐恐有腹中書  
頻年自識勞薪味指動無端忽累渠



與子畏上臣飲楊令詒孝廉宅

映門新漲碧鱗鱗  
步屨相過近有鄰  
江上萍踪三月社  
意中雲樹十年人  
傾來竹葉休辭醉  
飛到楊花不惜春  
曾是東風同下第  
每逢高會易傷神

寓窗書所見

孤城低壓青山麓  
人在山樓正倚窗  
忽有一帆移樹杪  
始知花外即長江

僧房多鼠戲次青丘集中乞猫詩韻

物以黠著名其性故狡獪詩有穿墉譏史徵渡江怪兩  
端持首尾同穴爭勝敗宵行競睢睢晝伏避噲噲飲河  
恣取滿食角忽入隘寧拚五技窮肯守一貪戒客來寓  
閒院古佛同破解下榻地無多羣來擾我界迎猫古有  
訓攫噬冀大快香積乏魚餐餘蔬雜饅餲公然掉尾去  
竄瓦等歷塊坐長鼠輩驕法門幾大壞聲疑蝙蝠叫惡  
甚蠅蚋嘍齧線袖旋穿污几經屢曬懶禪倒頭睡并少  
沙彌誠龕燈乍明滅慣伺神力憊客主滿堂中欺人盡

聾聵老夫非不聞恥與鬪機械逝將歌去汝鞍馬早可  
韉聊復忍斯須歌眠發長噫人間老吏多斷獄豈盡賣  
磔之肆階下微命直草蒯害有大於斯么膺法猶懈豺  
狼問當道此語堪下拜

皖城遇張損持庶常

別君四年前養痾卧鄉井繼聞君遠出訪舊歷鄢郢藥  
裹頗關心川長徒引領何期皖城下邂逅歸帆整春江  
展明鏡照見兩人影一訊眠食佳再看詩句警所欣神

氣旺餘力出鋒穎男兒鬪身強即事有循省我貧甘瓠  
落踪跡雜蛙黽君本青雲姿霜蹄早已騁姓名上館閣  
著作富彪炳間亦事清遊宦情冰雪冷却將燕許筆收  
歛耳目景自笑捲波瀾人誰測千頃猶然荷降氣米取  
到頑曠故交豈不多幾個念萍梗迂踈踵後悔窮老聽  
真境且盡十日歡歸期敢遽請

答婁東曾蘭坡次唐實君考功扇頭舊韻

唐庚

謂東江

吳質

謂元朗

並詞壇珂里流風尚未殘白髮江

湖稀老伴青韶朋舊半高官千金買賦愁何益二頃求  
田計果難慚愧新篇謬推轂故應仍作布衣看

任可將歸有詩留別次韻奉送三首

來何草促去何輕話到臨歧百感生並轡山程驢沒淖  
對眠禪榻鼠窺檠豪除湖海陳登氣老傍江關庾信名  
行李累君吾轉媿不曾彈鋏為魚羹

欲解孤舟又暫維畱行無計且遲遲夢回風雨春將老  
興盡江山句益奇萬事到頭難逆料獨行何地不相思

人生只有情難割容易并刀剪亂絲

胡麻好種盍言歸悵望郊園白板扉隨水孤萍無定所

時余又將  
往淦城

出巢雙燕又分飛鄉音伴我人餘幾家慶如

君世絕稀也道此番非遠別不知何事倍依依

損持見和前篇再疊韻奉酬

君才如轆轤倒捲百丈井運斤乃成風巧斲無匠郢和  
章出神速佳處心獨領關險初以竒好暇仍用整余姿  
實駑鈍何敢望鞭影未免竭蹶趨因君聊一警終焉免

冠謝老秃管城穎有顏知自慚在痛無不省稍窺作者  
意此事力難匱一生坐好遊四牡蹙靡騁忽悟旋已迷  
不文焉用炳北風吹短褐暖律中微冷逝收汗漫蹤少  
補桑榆景烏捷叱兩角碧沼開半頃欲回焦穀芽如鑿  
石田礦賦才亦分定造化豈可梗君苗硯欲焚邊幅窘  
詩境詞華公等事稼圃吾所請

同損持任可步入一指巖

借居古寺如雞埒破窗無紙戶礙眉庭荒草蕪一無見

卧聽別院鳴黃鸝故人敲門不暇懶邀我近出同尋詩  
平岡路轉百餘步忽有曲徑穿疎籬春光已殘夏方淺  
景物正及清和時新篁飄擗雨菽菽老樹吹絮風披披  
石榴初綻的皪蕊芍藥未吐婀娜枝三間精舍好位置  
高下恰與林巒宜寓居纔隔一垣耳向所未到今追隨  
自慚百事坐頽廢覽勝亦荷同儕貽

酬詩僧愷月

十日吟窗悵獨凭不知同舍有詩僧感深逆旅皆爲客



快比西南乍得朋芳草一簾花外磬綠陰半榻雨中燈  
從今便結尋山伴我著芒屨爾擔簦

詩筒爲損持賦

誰將圍寸竹截作徑尺筒粉筠削盡肌理出玉質外瑩  
其中空爲君滿貯詩千首投以琅玕報瓊玖寄去寧煩  
六六鱗捧來須得纖纖手

周通守劉明府惠鮓魚感賦

江橋市氣鯉細瑣雜鮓鰻鱈及子鱗邂逅適我願鮓

魚乃海味族類去人遠無端四月初來就捕魚堰成羣  
吹柳絮力小波濤困高價買銀刀克庖復奚恨千錢易  
一尾竒貨居負販何當地主情絡繹餉懦鈍於余誠過  
分為爾勉加飯憶昨京口城南包充北獻

至尊珍七箸官長申重巽千艘網夜集卅驛沙晨歎爭  
致五侯鯖誰焚百金券自茲遂成例難以什伯論乘時  
規盡取挂一肯漏萬遺落偶人間搜羅又焉避生平持  
竿手意釣本無悶竭來江湖遊飽食慚頓頓仁人砧几

憐豈獨泯恩怨竭澤慎須防擊鮮毋久恩

登迎江寺塔同程佐衡作

江山本無窮遠景域近見凌空得古塔覽勝斯獨擅方  
當賈勇登寧計足力倦一層一喘息屢上屢迴旋漸覺  
所歷高團團目雙眩大龍鱗甲動掉尾曳匹練東沈九  
子烟西掣五老電日光盪浮氣顯晦呈千變何來萬斛  
船初若葉墮片須臾到城下鳧鴨依稀辨應有舟中人  
回頭望雲岷江心指倒影了了識我面多生幻妄緣顛

倒徒自炫不如且暫憩萬象付虛盼直作御風行冷然  
有餘善

次韻會劉東舉

展翼須大風負舟視積水我無二者力於義昧知止魚  
鳥兩忘機波流任縈委蹉跎不自覺憔悴今老矣華髮  
映青衫無由脫塵滓近攜詩卷出聊復向江汜邂逅劉  
文房清吟壓錢起君家五字城藝苑久擅美千金新麗  
角八扎洞犁耳也似秦牛刀砉然入滕理專家尚難到

碌碌況餘子不謂薄領中兼長乃有此訟庭懸一鞭客  
座設四簋文書日堆案遮眼愛經史咳唾隨口成珠璣  
誰得似猥蒙獎許及欲報慚何以君本大廈材干霄養  
桐梓交章岳牧薦名姓上九齒猶復滯河陽年年種桃  
李譬諸閒草木臭味在蘭芷廊廟亟需才遠琛棄西珥  
築臺收駿骨應自郭隗始班超筆未投卜式爵爭徒輸  
邊半文吏磨盾雜象弭曷不走從軍尚堪作噉夫

用班超傳

三疊前韻答程佐衡

吾黨得程生紛綸五經井變風欲刪鄭高調乃和郢跌  
蕩到文壇鶴鵝可獨領談辭聽奮發儀度看修整實至  
名斯隨有如燈取影昔年入太學都講拔清警衆中頗  
不凡揚藻謂見穎淒然經報罷徒步告歸省余時亦客  
燕羶璉語交黽鴻飛豈顧弋馬繫終思騁內熱聊飲冰  
寧堪膏自炳至今清夜夢一笑齒為冷小別曾幾何雙  
丸劇馳景回思十年事倏忽若未頃君猶錐處囊我已

鐵錮礦向來期許意土偶遇桃梗正賴好江山鬱紆豁  
奇境明朝有高會徑造不待請

來日約遊  
大觀亭

弔元左丞余忠宣公墓二首

王氣江東五彩雲上流假手緩游氛若教京觀同時築  
誰表孤忠異代墳僭號無成終是賊殺身得地孰如君  
到頭此事關天幸不死吳軍死漢軍

殘局何須論上都一軍援絕勢真孤江山故壘殘骸在  
社稷中原尺土無計定全家爭赴難時危幾個肯捐軀

他時謫守含山廟，媿殺生降一老儒。

用危太僕事

佐衡置酒大觀亭，招同損持蘭坡志。鄴分韻得

### 嵐字

故人置酒城西南，攜我晚登百尺嵐。大觀亭在喬木杪，  
鵲巢近檻俯可禰。短牆截斷萬家井，惟見遠景浮青藍。  
海門一關三百里，白馬南下無停驂。南江勢與中江合，  
一折滙作蛟龍潭。孤亭如山撼不動，影入明鏡光泓涵。  
舟人水鳥互出沒，去者兩兩來三三。夕陽欲沈沙岸樹，




疎磬忽報鄰僧庵主呼痛飲客徑散要令耳目留清酣  
宿松朱字綠博學嗜古所葺南岳考三卷援據  
往籍至數萬言而斷以己意大要謂古之南岳  
乃瀟之天柱峰非楚南衡山也頃於皖城官舍  
出此見示索余題辭作歌贈之

皖中奇士推朱生文米奕奕千夫英手持一卷南岳考  
筆力獨舉千鈞輕首援六經證據確旁及百氏搜羅并  
尚書兩篇列四岳惟有泰岱名孤撐北恒西華南則霍

疆域錯見因圖經厥初相距道非遠天子一歲周巡行  
後來漢武禮天柱荒邈不及衡州衡可知瀟岳即南岳  
語雖似創辦頗精君家近住此山下高論直比山崢嶸  
火維一神欲易位此事乃可口舌爭我思鴻濛肇開闢  
羣山綿亘誰指名自從肆覲加望祀錫以封秩同公卿  
神靈豈邀軒冕貴世俗自炫壇墀榮界連郡邑互引重  
事出讖緯多紛更陋儒聞見溺沿習幸免流輩相譏評  
如君特識那易得我爾怪旁人驚昌黎南遷偶失考

詩句聊紀衡陽程他年重續輿地志待爾著述名山成



敬業堂詩集卷二十一

欽定四庫全書

集部  
敬業堂詩集卷二十三

詳校官左中允臣塘五珠

助教臣常循履勘

總校官庶吉士臣倉聖脉

校對官庶吉士臣吳裕德

謄錄監生臣范 墉

欽定四庫全書

敬業堂詩集卷二十二

翰林院編修查慎行撰

中江集

起丙子五月  
盡十二月

留皖城兩閱月九江郡守朱恒齋枉札見招復買  
帆溯江而上又踰月乃賦歸按禹貢有北江中江  
之名皆在彭蠡東孔氏傳以入震澤者為北江則  
古之中江當存皖口以上溢口以下今湖口一縣

當江湖之匪與經文所云東迤北會為匪東為中  
江者正合而正義引地理志乃指為震澤之中江  
竊恐不然輒据所歷考正焉

久客皖上將之江州劉東臯以詩見送次韻留  
別

大小孤山色西南兩點烟獨攜孤枕夢又上夕陽船岸  
濶沙沈樹風狂浪拍天感君投贈意臨別倍依然

酬別高雪亭

五年經遠別一月又將離捷徑人皆驚頭銜爾未移

雪亭

為桐城令九年矣

上官須善事衆口莫相疑但去沽名意後來

終見思

皖城早發却寄姚君山別峯兄弟

又背孤城去驪歌不忍聽薄遊逢地主久住為山亭月  
黑江光動魚跳霧氣腥檣烏啼最早愁鬢轉星星

黃石磯

水淺舟膠細作鱗半篙撐過石粼粼風傳茅店棟花信

山作畫家荷葉皺

王濛畫法也

鼓角自鳴孤戍壘江湖暗老

獨遊人郵籤不用長年報熟路重來免問津

重泊路灌溝憶十八年前曾阻風於此

沙嘴沿迴又一灣人家初在淼茫間帆生浦口霏微雨  
岸走雲根斷續山芳草迎船依舊綠白鷗如我幾曾閒  
可憐路灌溝邊柳暗閱勞生六往還

蘆洲行

江干積薪如列屋巨艦裝來聯萬斛天生此物充正供



歲歲陳根發新綠舊崩沙岸冊未除新漲荒洲報方績  
三年一丈久成例增減何曾量盈縮不知此課起何年  
坐待摧枯濕同束我聞王政有遺利藪澤閒田聽樵牧  
如今尺寸藉農丞作備必由桑與卜踏地輸租爾勿慳  
逃空那得出人間但看歸鴈知人意不敢啣蘆徑度關  
花洋鎮阻風望小孤山借東坡慈湖峽五首韻  
積水西南一眺空海門遙在有無中行人已達大雷岸  
好借半帆潮信風

遠色蒼然近晶然鷺鷥衝破夕陽天  
烟江疊嶂無人畫  
一硯題詩落眼前

魚網漸收沙際市酒旗猶綽水邊扉  
青裙縞袂誰家女  
日暮一砧來浣衣

萬竅爭號怒未融輕篙弱纜總無功  
老夫只作參禪坐  
定裏松濤起半空

小孤知我重來意先向江心轟片帆  
爲報白頭猶健在  
擬尋初約上巉巖

避馬當之險從磨盤洲經沙灣至喻家洲

清江吐白沙去岸二三里小艇泛舸艘團團磨旋螳江  
豚鼓鬚鬣簸蕩南風起篙工羣作力進尺退或咫尺馬當  
突兀來石狀怪且詭半為鬼斧劈倒插截其趾白鷺導  
我前依依投別汜紆途雖較遠脫險差可喜輕生涉波  
濤鹵莽迫暮齒前非踵知悔恐懼及茲始

阻風小孤山北晝夢家園牡丹盛開醒而聞鷓鴣

鷓鴣聲戲成一絕

羣仙一味嘲輕脫故引名花入卧遊却被鷓鴣呼客起  
黃蘆苦竹近江州

遊小孤山二首

并序

大江經湖口縣合彭蠡之水達於皖口禹貢所謂中  
江也小孤山屹立于其中當盤渦激湍之匯雖好事  
者亦罕遊余過此數數矣至輒風濤間作丙子四月  
杪從安慶溯江而上連遇西南風舟行濡滯五月戊  
午黎明發喻家洲刑牲默禱須臾風止余竊喜曰登

山夙願也神其許我乎亟令榜人剪渡山形三面懸  
峭惟西南一角橫石坡陀首受分派其下洄流可以  
弭棹攀磴北上劣僅容趾凡百餘級入洞門折而東  
鐵柱在焉稍西爲神女祠再上爲大士閣從神女祠  
西北上兩旁峭壁中穿石罅如入螺殼中背東面西  
已復折而北路盡一亭翼然行者必少憩以蘇喘息  
然後躋絕頂焉山之顛遠而望之初若半圭已而如  
拳如髻至此乃知其中分為二也環而計之東西北

皆方南獨圓南北長二里許東西得三之一東麓距岸約四里西麓僅三之一山之大概盡矣既序茲遊之始末又綴以二詩夫有所感也

一綫長江直向東可無拳石兀當中僧窗坐湧千帆日  
客袖來當五月風筋力將衰酬夙願波濤不拒賴神功  
山雲海市尋常事敢擬韓蘇說感通

鳥道羊腸盡坦途身先僮僕作前驅能為砥柱何妨小  
不傍羣山轉愛孤江海一關畱鎖鑰金焦兩點闢門樞

從他萬口流傳誤肯許彭郎作配無

小孤山神之為女郎不知始於何時

歐陽公歸田錄稱小孤在水中巖然獨立深譏轉孤為姑為俚俗之訛然東坡詩小姑前年嫁彭郎則宋以前

久承此謠矣

### 午日重登庾樓和朱恒齋太守

已上孤城又上樓使君高宴最風流  
重來湓浦逢佳節閒對廬山話昔遊  
畫鼓絳纒爭渡楫曉粧紅挿半開榴  
賞心事事多非昔不獨思鄉易白頭

### 湓城喜雨

塋田長苦旱

九江民俗呼遠水田為塋田近水田為龍田塋讀作胖上聲

炎夏方蘊

隆坐看匡廬雲出沒千萬峯不肯作霖雨厥占歲當凶  
天心有轉移夜枕聞靈靈火光出飛電起蟄鞭潛龍朝  
雨忽滂沱雲來相附從偶然得際會似欲貪天工野人  
本無心詩語出至公旱吾不汝罪雨亦非汝功

次韻酬南昌葉素我

寥寥海內幾同心此事終緣臭味深乍喜芝蘭留獨賞  
每談風月輒相尋數篇為我開詩戒一語從君進酒箴



惆悵琵琶亭畔柳中年聚散最難禁

題恒齋太守春江載鶴圖小影次韻四首

麴塵濃綠染初勻紅杏村邊雨洗新不向春江看畫橈  
誰知太守是詩人

也如泛宅也浮家畫舫移陰柳半遮好與茶山留故事

閒封遠信裹青紗

黃山谷以青紗蠟紙裹茶寄人不過二兩廬山產閒林茶故借用之

自飲廉泉不願餘更留何物伴琴書仙禽最得貧官意  
未肯臨淵便羨魚

一羣紅掌漾清波官閣詩成記放鷺

恒齋有放鷺詩

斗粟累人

添鶴料二千石俸近無多

今年官俸俱充兵餉

發潯陽訓恒齋贈別二首

遊踪官跡並沈淪管鮑交深在一貧小別星霜經五稔

遠來風雨又三旬弟兄托契情原厚兒女相關意倍親

料得他時了婚嫁兩翁俱是白頭人

時與恒齋初結兩姓之好

攀轅截鞵去何之廉吏誰云不可為風月招邀蓮社酒

江山開拓庾樓詩官情向冷憂還喜苦語臨分頌亦規

莫聽琵琶空洒淚清名難得

九重知

恒齋已挂吏議  
奉旨特留

重過湖口望五老峯

又挂輕帆過石鐘有情難忘是遊蹤風痕忽散一湖浪  
雲氣愛迷五老峯此日舟中回白首當年天半倚孤筇  
衰遲定被山靈笑歷險探竒漸漸慵

赭磯雨泊

午汗翻漿晚未融雨聲夜入荻蘆叢孤舟野岸少嘉樹

六月大江多暴

江湖舟人  
呼作報

風蚊響似為雷助勢螢光敢

與電爭紅等閒何用生分別多付微涼一枕中

彭澤阻風追憶壬申舊遊寄朱恒齋九江魏昭

士寧都

綠楊陰裏幾家烟小縣重來記往年劈紙風流看駐節  
隔江雲樹識歸船故人久別稀書札太守新聲在管絃  
欲上旗亭無酒伴鬢絲愁絕杜樊川

曉晴過馬當

風止波猶鳴空江蕩餘勢千帆散萍點飄轉豈有蒂夏  
雲少媚姿突兀拔空際小孤曉粧就回首露寶髻但覺  
兩岸移寧知一川逝詩成枕席上出語如噴嚏境過旋  
已忘中流方鼓柁

大雨泊東流城下食頃放晴二首

沙頭初繫纜船尾忽聞雷高浪吞天去長風帶雨來近  
城嵐氣合對岸夕陽開六月川程惡陰晴日幾回

只有青山色差宜雨後看天心今若此行役倍知難翠

柳騎牛岸清流浴鷺灘不逢陶靖節誰肯說休官

東流古彭

澤也

夜泊吉陽湖

酒旆當門柳拂船雨餘一帶好山川  
漁村吐火江初練葦岸沈鉤月未弦  
風進微涼知夜永客歌孤枕覺秋先  
亂蛙最是無情物苦向荒灣聒醉眠

曉發望江岸晚至樅陽

中流沄沄浪作花輕帆南下整復斜  
家書曉報大雷岸

客夢夜落長風沙船頭一轉二百里水面忽浮三兩家  
烟收霧散目力短白鳥飛去移蒼葭

樅陽僧舍消暑七首

樅陽古重鎮六代推繁華軍府建旌麾居民十萬家自  
從郡邑改夾岸惟蒹葭誰知近水市客饌無魚蝦

古刹聚劫灰入門尚茅茨曾經上番住徑造不見辭短  
牆日就頽故榻猶未移闍黎頗好事指我壁上詩重來

亦偶然翻觸徂年悲

壬申客樅  
陽曾寓此

昔與錢少陽茲焉互酬唱頻為文字飲屢荷難黍餉別  
中兩寄書松竹問無恙答言吾老矣後會恐難望世薄  
風氣衰老成果殂喪田間一茅屋過者今淒愴

傷錢飲  
光先生

道楷本名僧文士相往還築居傍闌闌長苦不得閒遠  
客寡交遊避暑來掩關汝出我居守嗒焉似空山

庭空白日長竹樹森成林彼當炎歊氣我受清涼陰北  
窗多好風時時中衣襟長恐俗子覺叩門來足音

客贈贛州蘭幽賞自矜貴遠遊無長物為爾添一累月



明看露光人靜覺花氣提攜成老伴一笑吾臭味

老夫方晝眠風雨來縱橫欠伸得餘味羣動了不驚電  
影搜破壁謂是吾眼明雷聲殷空牀謂是吾耳鳴須臾  
萬竅寂殘夢續復成

過青山弔田間先生示懷永懷玉兄弟及令姪  
廷益三首

田塍高下路欹斜小雨濛濛早稻花到此不愁迷失道  
讀書聲裏是君家

絮酒何辭觸熱過依然廢瑟在巖阿較他短笛山陽泪  
三世論交感更多

存亡出處總相關惆悵燕臺客未還滿架遺書付君輩

天教風雨護名山

時越秀客  
遊京師

順風過池口

舸艚船上南風急好片池陽雨後天九十九峯青不斷  
白雲蒸出九枝蓮

大通舟中看雨

南岸雲埋山北岸雲出岫乘時各行雨天本無私覆豈  
知倉猝間中有龍蛇鬪當其鬪未合中流猶白晝南勢  
漸北侵渡江躡窮寇馬牛殊順逆蠻觸爭左右北風忽  
不競退縮示免曹坐聽南風狂蛟涎捲奔溜雷公與電  
母飛檄亟相就盡助昆陽圍誰為鉅鹿救須臾賀戰勝  
雨點隨其後的驟走明珠淋浪撒金豆魚蝦半空落虎  
豹或驚仆我窮客江湖境險迫邂逅閒中閱造化觸目  
誇日富吟成看雨詩蓬隙日光漏

六月十五夜紫沙洲對月

檣船古柳岸江濶風吹裳快哉雷雨餘復此終夕涼清  
波洗眉目白露入肺腸炯然孤月明漏此一掬光願從  
魚鳥住永與江湖忘

當塗道中

六月江路惡驚濤戒舟杭挂帆入支河如馬馳康莊雨  
過禾苗齊風來蒲稈香平灘立鷗鷺淺草眠牛羊宛宛  
柳拂渠修修竹遮牆時見荷鋤叟休陰坐微涼游子久

離家歸心日夜忙寧知此間樂風土近故鄉

晚登高淳縣南水月閣

偶爾經過偶泊船偶登佛閣亦隨緣一茶不負居僧意  
留我西窗看稻田

渡高淳湖

曉程貪穩睡天色尚濛濛人語蓼花外鳥鳴茭葉中舟  
稀知路僻水淺賴潮通脫盡江湖險朝來不怕風

從泚練出西泚二首

到此無風也自涼繞身四面是湖光舟人遙指宜興縣  
孤塔對船如筍長

蘆灘淺處作人立白鷺一羣如白衣何事近船還引避  
故應慚我未忘機

九龍山下人家

小屋疎籬透晚涼亂蟬啼處正斜陽綠槐樹底通頭女  
風過微聞抹麗香

初登惠山酌泉

九龍蜿蜒來垂首吸百川歎雲洩乳竇至味淡乃全我  
攜陽羨茶來試第二泉山僧導我至古木枝參天不知  
閱幾朝仰視皆蒼烟蔭此一眼碧自然得澄鮮出山豈  
不清真質恒相懸竝嬰列市肆例索三十錢挹注苦被  
欺向來殊可憐會當置符調此法休輕傳

六月廿三歸舟過荷花蕩口戲作

綠水紅蕖連夜開明朝多少畫船來歸人合被遊人笑

揀取花前一日回

吳中風俗六月廿四  
日士女遊荷花蕩

常州道中紀事二首

一丈黃泥浪郊扉尚有痕孤城經雨塌百瀆被湖吞  
鷺鳴回頭失蛟龍掉尾渾亂帆如白鷺點點稻花村  
暴漲衝橋斷騎牛當渡船築塘連絕岸岸水出低田沈  
竈蛙魚入疎蕪荇藻懸天心人不測容易說豐年

春間從吳興買藕寄歸種園池中今歸自皖城  
白蓮已試花徘徊池上有作

廢圃遺利多汗池荒一畝養魚飽獮獮棄作葭萑藪計



窮乃得變水淺規種藕種藕利稍遲事在三年後先為  
看花計於義微有取呼兒移竹榻謀婦出斗酒舊來小  
池亭頽圮惜已久池南向有石亭  
亂後燬於火艱難生理窄一醉還  
家偶結茅何時成惆悵回白首

顏學山學憲招同劉坡千林碧山沈昭嗣湖舫  
燕集

京國頻年散素心湖山一夕盍朋簪笙歌隔座通荷氣  
臺榭移舟過柳陰解后不愁佳客少往還誰似故交深

只慚當路憐才意猶許方干作醉吟

九日同趙蒙泉項霜田楊次也泛舟西湖登孤

山和蒙泉作二首

清醪盈樽蟹螯黃故人有約作重陽啼殘楓樹鴉翻陣  
影拂蘆花鴈起行此日烟波還命侶去年風雨正遊梁  
回思南北勞勞路翻怪登高得故鄉

涵碧橋東畫舫停遊人多上

御碑亭樓臺頓改才人畫丘壑潛移處士星紅葉晚燒

諸寺赤碧天秋縱兩峯青詩翁老去狂猶昔肯向湖山  
更乞靈

唐考功東江為仇滄柱編修禮闈所得士今來  
典試吾浙出闈後為湖舫雅集邀余奉陪即席  
和蒙泉韻二首

前輩風猶在斯文寄不輕歐陽為座主蘇軾得門生一  
月了公事三秋多勝情旁觀爭太息誰不重科名

錦纜牽官舫餐錢費客庖酒開清茗甕橘拆洞庭包霜

嶺將楓葉烟隄尚柳梢湖山君作主何地置貧交

題吳紫萼所藏吳白畫設色金銀花

天公省事厭紛華  
淡白微黃本一家  
却被毫端勾染出  
無端分作兩般花

秦郵道中即目

以下十月  
北行作

不知淫潦齧城根  
但看泥沙記水痕  
去郭幾家猶傍柳  
邊淮一帶已無村  
長堤凍裂功難就  
濁浪侵南勢易奔  
賤買河魚還廢箸  
此中多少未招魂

舟經寶應居民被水者多結茅於堤上故廬漂  
沒不可問矣

蛟涎魚沫奪殘黎收復流亡賴此堤寒比蟄蟲宜瑾戶  
忙如巢燕正爭泥雲沈雪意千帆合天壓湖光四面低  
好與官家勤畚鍤免教歲歲逐鳧鷖

季冬朔日渡黃河

是日河水合而復  
開土人名曰灑凌

崑崙萬里來盛氣日盪決嚴寒一掣歛流汞變積鐵下  
容蛇龍卧上少螻蟻穴風雨過輪蹄雷霆駭魚鼈河神

不敢偵縮頸比蟲蟄東風昨夜至氣候改栗烈忽開無  
底竇耆與厚地裂將毋銀山崩散作萬堆雪小船晨喚  
渡投間伺其缺虎齒齧兩旁羊腸迴九折中流倘失勢  
過涉慮頂滅篙師駮瘡痕手足互流血非無白日照煦  
汝乍暖熱造化故無私寧為一夫悅客子衣裘單長途  
計尤拙歲窮迫行役既濟轉愁絕

王家營旅店遲楊次也家東亭不至

已過江淮半月期一行鴈羽尚參差勞人相傍貪同伴

熟路頻經漸少詩，急景欲回西日笑。  
輕裝那免北風欺，鯉魚信斷河冰合。  
悶極寒燈照影時。

紅花埠遇雪

記得芳時幾度經

自此至郟城五十里間桃花最盛  
余甲子己巳庚午皆於三月過此衝

寒明發又郟城橋邊雪，意詩催就鬚上冰。  
氣結成堆館迎來風北向，鄉程讓與鴈南征。  
敝裘或有天憐分，只費殘冬半月晴。

雪後蒙陰道中

日出天忽高山寒雲不附峯峯帶晴雪遠近畢呈露馬  
蹄碎瓊田蛇尾曳絲路草枯燒不盡白者疑伏兔饑鷹  
下攫之注目始知誤糾然巉身上却立槎枒樹樹更僵  
於人咆哮風正怒何處問旗亭衝寒背城去

張夏旅壁見德尹墮車傷指絕句戲次原韻三

首

役車歲晚幾曾休斗酒何時與婦謀此意自憐還念汝  
一燈今夜白人頭



一笑驅馳老未休  
墮鞍如與少陵謀  
回思下澤車中客  
不爲封侯合轉頭

安穩生涯一醉休  
天全畢竟勝人謀  
人間險語何須鬪  
不說矛頭即劍頭

趙北口夾堤柳陰最密  
不知何故盡被斫伐存  
者惟枯樁而已  
感歎成詩命兒建同作

五度征鞍柳拂絲  
重來禿幹已無枝  
摩挲老眼還三歎  
看汝成陰又幾時

白溝旅店見甲戌冬杪題壁詩談是山繼和一  
首再次前韻兼寄未庵

帽裏驚沙鬢點霜三年前記卸行裝天寒倍覺暮程遠  
酒薄不禁冬夜長吳語同來還有伴燕歌相和若無旁  
詩成為報君兄弟飛夢三更已帝鄉

敬業堂詩集卷二十二

欽定四庫全書

敬業堂詩集卷二十三

翰林院編修查慎行撰

得樹樓集

起丁丑正月  
盡十二月

吾家自喪亂後僅存橫溪老屋與兩弟同居余所  
棲在西北隅年深瓦落不足以庇風雨丁丑春大  
兒倖舉南宮挈之還家爰即舊址改築小樓樓成  
而老木數十章皆在几榻間因取少陵詩意顏曰

得樹

人日同孫松坪張漢瞻楊晚研宮友鹿錢亮功  
方拱樞吳元朗蔣揚孫家德尹集王赤抒卹舍

分賦上元燈八首

四垂羅帶影飄飄一線中懸愛細腰莫傍市門輕銜影  
有人依樣要偷描

瓶口紅光忽吐霓醉人相對舌如箕却因酒具名相似  
記起花時烏勸提

右葫蘆燈

偃僂聊為秉燭遊似曾閱世笑蜉蝣朱門光景番番換  
幾輩相看到白頭

故紙形容大可憐敢同南極指星躔誇人只有香山老

張丈前頭炫少年

右老人燈

鱗鬣粧成畫不如竿頭擎出晚晴初九衢塵淨月如水  
一隊人隨一隊魚

星橋鎖動沸波濤人海中間湧巨鰲多少書蟬曾飽死

讓他朽腹事焚膏

右魚燈

一幅輕紗隔座深  
芸窗小立夜沉沉  
不爭六曲屏山好  
虛費人間屈戌金

三尺孤光一片冰  
當筵珠翠照何曾  
眼昏已少看花分  
更隔看花霧一層

右屏風燈

二月杪南歸涿州道中遇雪十八韻

頗訝今年雪方知  
此地寒春深猶漠漠  
野濶更漫漫  
咳吐紛珠玉  
飛揚富羽翰  
近從烟際辨  
遠入霧中看  
鴻爪輕留跡  
楊花滾作團  
風輪旋蟻磨  
車轍轉蜩丸  
銀海光

相耀瓊田暖未殘，密防蟲戶啟。細補鵲巢完，淺草勾尖。  
沒枯株萬木，攢千家如畫。裏雙塔指城端，石滑經橋怯。  
沙平取徑難，幾曾填窞井。特為顯峯巒，席帽融冰濕。征  
衣燎火單，茅茨雖易壓。穴隙莫相鑽，對爾吟慙郢。催余  
鬢比潘，勿愁燈焰短。直愛酒升寬，朔候何當變。泥塗不  
肯乾，明朝有奇計。酩酊上歸鞍。

連日車行泥淖中，朝來僱短驢。自固城至安肅，  
縣凡兩墮鞍。即事有感。

雪消春水發古道窪然低客行忽落此局促如雞栖兩  
車同隻輪六馬併一蹄力盡甫脫險阮深復無蹊長恐  
雪繼作有滄雲萋萋晨興天色佳日脚垂虹霓跨驢橫  
短策快比駿駛騃西南見郎山刻露出角圭寧知一往  
氣世路偏多迷蹶跌豈及防康莊有排擠前行苟無失  
遲速理亦齊還來車上坐且免衣沾泥

保定旅次閱邸抄得從弟東亭及兒建南宮捷  
音口占志喜兼寄嘲老友姜西溟



郎報傳來樂事重一尊相屬慰浮蹤  
青春三月客懷好  
白髮半頭歸興濃  
子弟聯翩同榜羨  
家門成就老夫慵  
探花却入少年隊  
試問髯姜可勝儂

時姜亦成進士

渡三汊河聞前路泥乾喜而有作

三汊河畔水濺濺  
洗盡春泥上渡船  
從此騎驢似騎鶴  
折條垂柳當歸鞭

晚抵安平縣

野曠天高落日紅  
近城烟氣忽如籠  
楊椿綠上鷓棲處

草意青回馬跡中昔夢尚驚泥活活歸心還怕雨濛濛  
衰遲自分邀天幸坎陷迴車路未窮

大風過深州城外

驚沙滾滾日黃黃不料東風爾許狂茅屋捲空留破柱  
酒旗吹折剩萸楊幾家賣餅枯壕畔一老扶犁大道旁  
為話連年秋潦苦出車畿甸正輸糧

曉渡衡水橋風色甚寒小飲市樓

石古橋滑臨奔湍衡水流濁同桑乾高樓下瞰岸千尺

美酒大書旗一竿帽絮蒙頭欲敗意魚羹入饌聊加餐  
杏花全未有開信知是北來風色寒

棗強道中喜晴

斷雲開四望初日解重陰野氣浮天動烟光薄樹深疲  
牛尋故跡老馬得歸心題徧旗亭壁何人識苦吟

客有稱高唐州為縣駒里者戲成絕句

野語齊東最易訛縣駒遺俗近如何自從一變崑山調  
不是吳兒不善歌

大道曲

荒雞聲遲月落早行人出門看參昴一條大道飛古塵  
歲歲何曾長春草我欲疊作山羊腸九折爭躋攀我思  
鑿成水洄人出沒波濤裏直教馬無四足車輪方此路  
始應春草長

穀城山

東阿城東穀城趾傳是仙家舊鄉里圮橋老叟果何人  
能致留侯跪進履兵書一卷既不傳事往無徵正在此

秦皇凶暴蔑賢聖偶語詩書皆棄市布衣起自泗上亭  
溲溺儒冠固其理此非可以正道說詭託陰符自茲始  
竟參帷幄佐竒謀躡足時時還附耳大蛇中斷羣雄滅  
走狗旋烹舊臣死舞陽活自女嬃偷蕭相生遭獄吏恥  
子房遠禍蓋有道直視侯封同敝屣神仙之說誠渺茫  
有托而逃斯隱矣陋儒讀書寡深識異事人人徵太史  
後來競指黃石公當日原無赤松子我為此語豈好竒  
石若有知呼可起

黃河打魚詞

桃花春漲衝新渠，船船滿載黃河魚。  
大魚恃強猶掉尾，小魚力薄唯噙水。  
魚多價賤不論斤，率以千頭換斗米。  
河壩大潦秋不登，今年兩稅姑停徵。  
但願田荒免逋賦，與官改籍充漁戶。

大風渡黃河舟中與長源姪對局

柳絮春狂剪渡風，片帆飛下急流中。  
船頭已達長淮岸，一局殘棋劫未終。

過揚州示崔性甫楊曉先兩同年

不到紅橋已八年有人柳下記停船  
楊郎落第崔郎病縱使同遊越可憐

閏三月朔日蝕舟中遇雨紀事

丁丑閏三月日蝕法當既明星晝當見  
從卯當至未白晝如黃昏果然伊可畏  
舟行拚偃卧閉目聊自慰何來打蓬聲  
雨點驟如沸皇天闕垂象下土雲翁輓  
似欲弭此災而為不祥諱我聞日當食  
不食乃足貴豈有晦昧

晨又蒙霾霧氣將毋陰太盛推驗得髣髴六師方犁  
庭欖槍掃敵愾佇清沙漠塵聲教朔南暨公卿滿臺閣  
賀表辭不費五事占休徵竊疑非此謂天變雖偶然民  
勞亦宜墜野人語無擇托興在蒼蔚不敢學盧仝險艱  
殊少味

初到家戲謝戚黨之見賀者

趨伴攜兒出帝畿到家猶及換春衣遠煩親友來相賀  
不道余仍下第歸



兒建赴殿試北上詩以示之

今年夏苦旱六月未徂暑兒子將北行衝炎逐徒  
旅留之又不可遣去無多語汝名已倖成汝力正須  
努

天子方右文策名在當宁萬言應廷對有抱期畢吐煌  
煌鐘虞懸叩擊諧律呂自從制科設得士凡幾許置汝  
于其間太倉特一黍然而勿自薄儕輩盡翹楚同年百  
五十若者指可數父事中有人

姜西溟吾癸酉同榜嚴  
寶仍吾同學老友也

雁行敢兄序功名亦時至非可有意取造物吝虛

名齒角肯兼予吾宗兩太史

荊州兄  
聲山姪

並筵搏風羽

盛事傳一時借居隣韋杜雖云官禁近未免索米

若汝今往暫依慎勿希華廡秋深決歸計且復返

鄉土久甘南巷貧差勝北門窶千薪尚壅積銓注

十纔五從政雖多途不如科目舉讀書想先輩既

進或慚沮豈必一第邀便思行綰組閉門更力學合

轍驗今古却出作選人於世冀小補而翁百念灰自

審莫若處諄諄向臨發庭誥述父祖吾但當弄孫門戶  
全付汝

得樹樓初成以詩落之九首

百年計樹人十年計樹木辛勤荷先澤以有此老屋兵  
火乃幸存曩基方改築勞生竟何得去此空馳逐  
誓收湖海蹤歸掃一庭綠樓成名得樹外是非吾  
欲

吾架初度材謂在百金內銖銖累木石所費奚啻倍貧

家舉事難輕發每追悔連朝責逋負工藝集羣喙將為  
逃債臺一笑付聾聵

列垣周四隅與樓勢迴環憑高無遠矚胡以開心顏竅  
壁延綠陰少見天疑慳別添一小閣忽湧海外山豁然  
百里目乃在圭竇間

貞白居三層元龍卧百尺神仙彼可致豪氣我非昔方  
當狎斯人未許校什伯敢云去地遠稍與雞豚隔尚恐  
鳥雀羣移巢避生客

一榻雖已安終慚自為計  
心長髮苦短力不及諸弟前  
人締造艱親歷始知勤  
撫茲念堂構補葺當次第  
身在

吾敢辭茫茫配根蒂

用少陵四  
松詩中語

設梯盡十級偃僂連  
睢尻日上能千回  
兒孫捷飛猿阿  
翁貪靜坐嗔嚇時  
一遭形神既未忘  
那免陟降勞  
習勞亦不憚所戒舉趾高

卑濕苦舊棲老根連  
草蔓新來稍軒敞  
恰直樹之半  
雖除螻蟻綠却被  
蜩蟬亂朝眠  
與晝坐鳴聒傍  
几

案推窗驚不去，踈響或一斷。喧寂兩聽之，老夫化成見。

夕陽轉庭西，樹影來牆東。龍蛇動戶牖，始知天有風。開襟亟當之，快若逃虛空。人間正炎熱，置我微涼中。

竹垞工八分大字，作擘窠為余題。歲月惜墨不費磨，懸之樓中央。筆勢翻江河，疑挾風雨至。颯然散高柯，時卧其下所得良已多。

樓上看雨

卧聞牀下殷輕雷起拓南窗八扇開  
牆缺雲流山影去  
樹頭風截雨聲來一鳩逐婦移陰立  
雙燕將雛取勢回  
我本無田還望歲略分餘潤到蒼苔

題周兼畫南唐小周后真六首

人間姊妹工相妬遺恨茫茫豈有涯  
怡悵瑤光梅信晚  
一枝潛進未開花

湘裙如水不擡風鳳味攜來倒挂紅  
色色丹青無著處

泥金一縷在雙弓

月暗花明霧氣多  
盈盈羅襪步凌波  
外間誰管深宮事  
偷唱新聲子夜歌

不須更減一分肌  
周昉繇來善貌肥  
如此丰姿如此畫  
當初猶道未勝衣

開寶初元議禮遲  
待年承寵已多時  
在廷只有韓熙載  
曾托元和諷諭詩

垂鬟分絡髮初長  
想是南朝時世粧  
指與俗工從未識



可憐絕筆付周郎

時兼惜  
已下世

晚景

晚景蟲聲入空庭  
易夕陽鵲巢風更穩  
鶴骨露初涼  
病葉非關蝨  
秋花不取香  
物情閒處得  
吾轉惜流光

次韻答顧搢玉

失學負壯年  
東西逐烏兔  
蹉跎髮漸絲  
落拓衣仍布  
希心躡前踵  
回首却故步  
歌筑混屠沽  
唱酬雜緇素  
歸來稍稍悔  
事去種種悟  
庶望針砭加  
奚啻雪霜雨

去聲  
雖蒙

同人憐或恐異己妬之子負高才於余枉佳句紛然蓬  
麻中直拔千尺樹溫恭具真性磊砢得竒趣何期天畔  
鴻狎此沙頭鷺知音世不遭敢惜肝膽露雞鳴風雨晦  
旅館燈燭暮明朝走相尋戶外有二屨由來意氣合詎  
若邂逅遇君家門地高舊是雲間顧昂藏自殊衆標榜  
不在互問途慙已經吾老乃迷路

雨夜過徐淮江二首

萍浮梗泛久西東每過南湖憶此翁斷港船通新漲水

空庭樹拔去年風五經自課佳兒讀半刺曾嫌俗客通  
好是扣門能不拒一燈重對雨聲中

草堂南畔小池幽一片蘆聲蓼穗秋滿壁詩牋存沒泪  
積年書疏往來郵閒追昨夢驚彈指老剩貧交幸到頭  
未免對君還自媿桑榆晚景亟宜收

八月十六日同鄭春薦嚴定隅吳紫莓家潤木  
湖頭小飲風雨大作泊舟湧金門外是蚤襍被  
而出晚來興盡入城戲作一律邀諸子並和

及到繁華地翻成寂寞游烟波三百頃風雨一孤舟山  
好偏宜澹湖空易作音秋却防漁父笑襍被不曾留

種菜四章

晚豆尚沿籬秋瓜已除架畦丁惜地利菜子及時下功  
力積纖毫滋培仰造化勾萌達新雨布綠密無罅一旬

可分蔣半畝不待借

用東坡事

既足散其餘猶能乞

音隣舍氣

灌溉既已勤其長亦奮迅窠窠盡發洩生意不少吝連  
朝風日晴秋蟻忽成陣洒灰得方法經驗始深信幸是

力能施何難手除疢黍苗被蟲食四野年不順老圃奪  
天工忍饑聊免饑

晚菘雖弱植不怕霜雪加秋種春可殖盤餐佐貧家根  
株諒無幾口腹豈有涯人間賣菜傭求益方紛拏禦冬  
吾有計旨蓄良足誇

杜陵客西川種藝頗有園清晨送菜把乃感地主恩茲  
事吾不取恐為貪夫援於世苟無求食力稍自尊英雄  
亦如此無事且閉門

九日獨行園池上看木芙蓉

雨後罷登高杖藜惜腰脚園荒少秋菊無以慰寂莫兩  
株木芙蓉紅白正聯萼忽然失明鏡萍漲水將涸坐使  
兩嬋娟影妍無處著空持好顏色脈脈自開落應得主  
人憐新晴走赴約吾衰減情累於物何厚薄不忍廢重  
陽逢花還命酌

友人齋中看菊

幽人如晚卉愛傍籬邊遊瓦盆薦茅齋高下凡千頭紅

紫豈不好黃花乃吾秋森然羣豔中正色與目謀競賞  
違衆嗜獨吟發孤愁泉明不可作孰與偕唱詠

喜又微姪自南昌歸

共客洪州幕回頭十五年未成宗炳卧各有尚平牽身  
健貧何礙吟深句必傳故鄉稀酒伴日日望歸船

傷庭前牡丹四首

別樣風光散綺羅豪家亭榭占春多天公直似相欺得  
不為茅齋剩一窠

兩行枯卉列東西綠上苔痕路不迷  
夜月魂歸吾望汝  
半年猶護種花泥

自知未到忘情處幾度徘徊惜好枝  
不獨我憐人亦爾  
空欄客過立移時

依稀一夢閱繁華草沒庭荒野老家  
省却暮年多少事  
灰心從此不栽花

觀刈早稻有感

襍襖相逢半壓肩刈禾爭趁老晴天  
蒹葭對岸遮隣屋



蚱蜢如風過別田地瘠不知豐歲樂民勞尤望長官賢

誰知疾苦無人問秋稅新增戶口錢

吾邑戶籍十萬每丁歲輸力役之征

今年忽從田賦加派數百年舊制壞矣

### 偕介菴叔訪菊步入鄰僧融然房

偶聽村家打稻聲夕陽影裏向西行一叢深樹擁精舍  
兩板壞橋支斷浜靜對老僧通菊氣怕逢俗客問花名  
只將我算東籬伴不要溪頭費送迎

### 家釀新成獨酌至醉

種秫始徵收釀法遵舊譜逡巡竢其熟計日屈指數朝  
來香滿城甘滑如潑乳開嘗親洗盞一飲一升許好客  
期不來頽然自稱主黃農忽已遠薄俗難久處寧知醉  
鄉中風氣仍太古尊前可徑造有路胡勿取

秋感六首

蟋蟀鳴近牀蛸蟬聞無聲二蟲相代禪中已寒暑更大  
哉造化理乃以微物呈人從此中老擾擾何多營天機  
昧羣動靜者觀我生

末俗愛盆山花草妃紅白看看耳目玩屈辱到松栢可  
憐千丈材窘束不盈尺寓形難自主抱性終莫易亦復  
耐歲寒蒼然傍几席對之還失笑未覺生意窄向非冰  
雪姿雨露有天折

菊蓋日以黃楓葉日以紅物情判老穉變態隨霜風霜  
風故無私榮悴兩不同一般賞顏色矇叟隨盲童

西鄰一老樹有藤縈繞之歲久腹漸空槎枒但枯枝借  
藤以為葉下蔭仍紛披藤如有矜色張王去方乘時爨

新伐不材斤斧旦夕施樹摧藤亦斷附麗終奚為

世衰分誼薄適用取目前紈扇遇秋風一度一棄捐不  
念昔當暑與人久周旋我有敝羊裘隨身二十年皮存  
毛半附無補冬號寒明年與汝期五月拂釣竿

渡淮橘成枳一變性終失不聞返故土枳又化為橘人  
生百年中孰是保初質就衰水赴壑駐景戈挽日幾見  
白頭翁鬢霜復如漆

送學菴弟入都

黃葉打茅簷北風如矢棘此時來叩戶問子有底急為  
言將別家結束赴京國可無酒一杯為子煖行色匆匆  
乃徑去有語惜不得子誠吾家駒頭角早岐嶷賦質負  
高明秉心就沈默讀書十行下洞照窮相闕經史及百  
家貫穿歸組織時文雖小試落筆輒英特皇天不憐才  
盛壯遭屈抑十年躓場屋知者為太息昨遇曲阜公青  
雲加賞識拔之冠多士庶用示矜式虛名萬口傳子故  
深自匿窮鄉尠生趣巷遇歌偈仄堂上有老親鬢絲白

變黑鑿坏豈得已彼此傷遠陟幸托賢主人

時與陳實齋黃門同

行  
解推濟其嗇男兒志未遂放轍無南北不聞橫海鱣

蟠尾肯溝洫余方踏歸路投老尚迷惑子真賢友生

東坡

詩豈徒為我弟  
要是賢友生

朝夕宜在側奈何不能留又復奪有力

江湖歲月晚追逐乏羽翼道逢南來鴻寄書慰相憶

送陳實齋給諫服闋還朝兼呈大司農澤州陳

公時吾邑賦役不均頗望當事者留意也

三年簪筆作名臣四紀還家為老親

實齋前以  
終養乞歸

仕路卷

舒雖在我田間屬望更何人朝無遺闕書應少邑有更  
張見頗真為語司徒仍舊制也教游惰識公旬

介菴叔惠菊花

宗老移花到家童掃地迎澆深經夏早開晚及秋晴酒  
復何人送詩從即事成濁醪留一醉珍重見君情

次兒武原歸舟又得菊數種

道遠宜兼土船輕不費擔好花來一一荒徑闢三三萬  
事同兒戲餘香借客談瓦盆非俗物多取未為貪

有攜折足几來售者以百錢買之

折足用不適傾囊計亦疎聊將安破硯或可配殘書棄

置終憐汝枝梧頗累余難憑非一几舊友比何如

宋人詩舊

友誰如  
几可憑

園中西府海棠秋盡忽發花

萬木正搖落一枝春忽回縱饒花意好不稱此時開草  
本名相托霜風艷恐摧天寒憐袖薄為爾一低徊

客來



與世了無競并教棋局閒客來無一事離下看南山

再偕介菴叔過村西僧舍看菊

憶昨披榛入經旬踏葉來秋花偏耐久名種或遲開天

意晴連月

自重九  
後不雨

人生夢幾回屢遊貪佛日原不為銜

杯

冬曉語溪舟中

江鄉已牢落冬候更蕭條風葉鳴孤樹霜溪影一橋沿  
塘收蟹斷遠市插魚標雀鼠何多耗年荒爾獨驕

陳傅巖給諫以種園圖索題二首

身在元龍百尺樓  
菴居那便署休休  
慣聽絲竹知魚樂  
別築陂塘領鶴游  
僮約屢申松菊徑  
水租新報芰荷洲  
黃橙綠橘皆垂實  
歲計如農亦有秋

鴨舍鷺欄

關門內橋名  
見吳郡志

地接聯鄰翁指點  
舊平泉

園為  
申文

定公  
別業橋通別業仍三徑  
樹到成陰已百年  
碁局且從閒  
處布畫圖留與後來傳  
看君用意真幽絕  
要使詩家賦

輞川

虞山張文貽乞節母于太君七十壽詩

妻無夫兒無父襁褓伶仃半生苦兒無父母有兒白頭  
綽楔光門楣人言張子孝我謂子孝由母慈人言張母  
賢我謂母賢非子世不知不見吾家節母苦節與張比  
旌典不加坐無子今年生亦七十矣

家叔母葛太君十  
九稱未亡人去年

六十九苦  
節而沒

歲寒雜感十首

斗室寬然著老夫久伸纔罷又跣趺書能引睡聊遮眼

吟不求工似惜鬚古佛可燒同楫拙濁醪得煖勝醍醐  
自從悟徹安心法儒墨同歸識一塗

萬里從戎記黑頭不成一事老林丘稍收芋栗宜充腹  
不犯冰霜可廢裘橘柚洲前非楚澤鵲鷄沙外是涼州

最憐跋扈飛揚氣歲晚因人尚遠遊

聞德尹於十一月赴涼州幕府

文章鐘鼓付盲聾都入閒吟靜嘯中敗竹行疎猶響雪  
枯桑葉盡自鳴風物情豹隱龍蛇蟄歲事星回日月窮  
不信鄒生居黍谷能吹暖律挽天工

小閣簾開取向東，寒天強半是西風。  
瓷罍減水朝防凍，布被加絛夜代烘。  
袖手輸贏迷黑白，轉頭兒女換青紅。  
自知於世全無用，新署頭銜號長翁。

宋陳造云物之無用者為長故自號

江湖  
長翁

力田制策已殊科，忽枉瑤箋到薜蘿。  
得路君言猶若此，

窮愁我况更如何。

同年顧書宣見寄詩有病中趨死易貧粟養生難之句

行藏委

運談何易人鬼論，交意太苛。

虞山錢玉友寄詩有窮通判人鬼隔絕如陰陽之句

傳語兩家多憤激，向來結習費消磨。

鑿開渾沌本無情萬竅從教怒不平  
巧竿誰能推雪片  
頑空何自起風聲陰陽橐籥機相引  
水火丹爐勢必爭  
真宰茫茫竟誰是難憑齊物詰莊生

偷存子敬舊寒氈與汝相依已有年  
向老情懷偏戀舊  
過時顏色敢爭妍懶魚冰底頭頭伏  
凍雀枝間箇箇拳  
便學蟄蟲吾亦得屈伸何事乃關天

無聊且作杜門人肯逐鄉風鬪比鄰  
俗儉稱家刪饋歲  
年衰無伴看迎春生涯豈可謀妻子  
鄙事何煩瀆鬼神

但使黃金同土價，齊奴已婦一時貧。

誰將正變溯源流，今古何殊貉一丘。稊米太倉雖見錄，

遺珠滄海詎勝收。斑窺半豹難為管，腋萃千狐始是裘。

好與風騷搜累代，他時文選續名樓。

竹垞先生書來相約同選宋元明詩

剝啄聲中歲逼除，督催詩債甚追呼。不徇俗好頭今白，  
自去名心膽更狃耐冷。且來尋筆研消閒，差覺勝擣菹。  
此中甘苦何人識，豈獨雕蟲悔壯夫。

聞李辰山藏書多歸竹垞

嘆息詩人失李頎  
柘湖回首舊遊非  
自憐老友今無幾  
且喜藏書得所歸  
萬卷又增三篋富  
千金直化兩蛙飛  
平生謬託知交在  
悔不從渠借一瓶

近遊集

起戊寅正月至三月

東廣微志狹九州爰作近遊之賦  
跡不越井里田園事不離衣裳  
男女近則近矣於遊之義奚取乎  
余自己未至今南北往還約計七  
萬里將收游蹤自遠而近茲集所  
以志也



戊寅元旦

屋頭初日靄春暉  
梅蕊看成豆粒肥  
扣齒焚香吾起早  
敲門投刺客來稀  
舊梳白髮新逾短  
貧煉初心老肯違  
苦覺鶴山聞道晚  
方知四十八年非

親了翁詩四十八年成一非

盛宜山新築辦香菴於南湖之上雪中過之索

詩賦贈二首

三十年前舊酒徒  
天教晚節占南湖  
不辭太守分清俸  
便有遊人指畫圖  
水鳥雲帆爭出沒  
風簾雨檻對虛無

繞籬尚少成陰樹先種芭蕉一兩株

半間小閣一枝藤餘事行看次第增野色憑欄牕面而  
遠烟浮樹塔層層不知雪裏參禪坐何似花時挾妓登  
畢竟前言吾是戲近來詩派併傳僧

雨中同朱十表兄過宿徐淮江聽鶯齋

去城日已夕曲折尋枉渚水涸舟屢膠用篙迺舍櫓兩  
人苦兀坐拄杖入村隴稍稍深竹間疎燈翳復吐此來  
占不速况復往遇雨犬吠僮僕嗔開門揖賢主熱薪燎

我衣敲冰轆汝釜明朝迫人日節物良有取剪韭佐春  
盤嘉肴竟踰五新年困酒食愛逐清談侶一醉不得辭  
重君風義古

穀日至當湖沈南疑招同孫嘯夫過陸瞻成耕  
廬探梅分韻得豐字

殘冰消盡水光中短棹移灣港汊通小圃花經人日雨  
先一夕微雨故人酒敵石尤風溪山興發長先到肴核年荒

勿太豐醉墨歌斜吾自笑草書未暇為匆匆

是夕瞻成索書楹帖

凡三易紙  
乃成故云

大風渡前山漾

川光蕩我前一碧開玻璃岸濶山斷續船輕浪參差但  
聞捍索鳴心與閒雲馳萬木盡却走孤帆正窮追道場  
屹不動白塔如卓錫平生汗漫遊老嬾意漸隱結念在  
茗雪泛宅方自茲

重至湖州戲簡許舜功張桐軒兩學博

偶然乘興到西吳社日還尋舊飲徒不用詆諧歸割肉

上丁纔過定膳吾

座主清溪徐公招同楊玉符編修談未菴文選

泛舟碧浪湖

蒲柳城南水一方三年重此泊吳航  
閒陪白社青門客  
愛入銀鷗雪鷺鄉  
帳下諸生看漸老  
甕頭吏部最能狂  
烏巾美酒東風汎  
并作澄湖匹練光

雨中游飛英寺次東坡稀字韵

春陰覆城堞  
花淺游人稀  
愛此北郭幽  
晨征夕忘歸  
盤

旋上窳堵恣眼窮清暉東風拂面寒細雨濕我衣客來  
僧啟鑰客去僧掩扉跡在有迎送心空無是非

春分前一日余征吉學博招集杏花下

落盡苔枝春欲分杏花庭院又斜曛得錢沽酒即須覓  
誰似能詩鄭廣文

登道場山次東坡先生舊韵

船迴浦溆淺徑轉村隍小不覺坡陀高騰身萬松杪菰  
城陷井底白塔巘雲表浮氣盪一州湖波白渺渺天長

接遙翠目極青未了漸上伏虎關羣峯忽環繞清颺蓄  
戶牖古殿深且窈脈絡引檻泉渟泓匯池沼長廊百餘  
步旁入逾幽悄蒼鼠竄別枝投空攫啼鳥巋然翠微閣  
中敞外見少野火不到山蒼蔚復誰燎坐令杉桂材蒙  
茸委蓬蓼飛蟲晝轟聚高蔓晴夭矯老僧守空庖恐作  
山中殍軍持乞米出厭寂喜膠擾我來久徘徊愛此吟  
風篠春深花淡淡日暮雲皞皞餘暉帶疎鐘詩境墮空  
杳古今一大夢回首隔昏曉

二月十六夜自長水塘乘月放舟二鼓抵嘉興

城下

兩岸朧朧桃李花一天風露屬漁家小船卧聽櫂歌去  
行到鴛湖月未斜

同竹垞表兄飲譚護城給諫南樓看海棠

我愛城南給事宅海棠兩樹紅交加牆頭過酒便留客  
樓上點燈兼照花濯枝偏宜的矚雨倦眼似隔朦朧紗  
徑須時赴二老約爛醉不問東西家



寒食鍾復周秀才家看海棠和鍾飛濤

一樹萬花稠花光盡入樓  
偶逢寒食賞偏憶少年遊  
照座驚紅艷傷春到白頭  
苦憐風雨惡燒燭為君留

清明日南湖泛舟

積雨初霽交清明桃花杏花飄滿城  
城南水色綠於酒  
鶯鳴一灘春草生

曾道扶學憲惠蜀中藥材

吾比多幽憂早衰坐善病  
豈無三年艾真儂苦難證  
炮

灸投成方庸醫執其柄邇來讀本草稍稍諳藥性蜀山  
美產多州邑若畫境靈苗倘易地厥品變邪正時俗但  
徇名采真復誰更先生校蜀士甲乙手親評開籠貯參  
苓拔茅羣有慶餘材搜草木良楛別明鏡萬里宦游裝  
錐刀肯相競大江五六月風壯波濤盛百束壓歸艤蛟  
龍不敢橫分張荷見及行篋忽輝映從來苦口利義比  
良友諍若待倉猝求誰為緩急應於公感深意臭味殊  
可敬

上巳雨中同竹垞及兒建再赴淮江招

三月三日東風寒徐尚書家春未殘半篙新水綠忍唾  
兩樹碧桃紅耐看蛙黽幸未聒人耳蛤蜊大可充君盤  
一番相過一冒雨笑口欲開爾許難

題沈南疑林屋山居圖卷子二首

莫簷峯下是查灣及記扁舟壓雪還一事至今留缺陷  
不曾西到石公山

浮家泛宅事良難綰綬行將赴一官縱使買山爭得住

故應寫作畫圖看

自入春來往返嘉興湖州兩郡凡六十餘日穀  
雨後還家花事盡矣

累月扁舟碧水潯歸來三徑已春深樓頭一帶槎牙樹  
多為黃鸝換綠陰

題又微姪載花圖小影

落魄江湖不計年風流別是一生緣桃根桃葉無顏色  
迴避儂家載酒船


再題種菜圖二首

還君一首遂初賦和我三章學圃詩  
彈鋏思魚原失策  
封侯食肉更何時

黃蘗百藝亦前因腰腹如渠那稱貧也  
與萬羊同一飽  
算來原自可驕人

題族孫恒宏看舞圖

可是相逢游冶場  
由來壯士愛紅粧  
試他舞袖長多少  
紅暈輕巾是電光



敬業堂詩集卷二十三